

CADASIA YACNOCQUIDON ISTE

Pabadon tauamboen chiaid

¹ Pabado nebi. Esus chuibenequidquo nebi. Matsesën: —Adquid icta —¿caidtabi nedi? Padenquo. Esuquidistun: —Ëbi chuibeneta —caidquo nebi. Aid uincuemendaid Nuquin Papantsen: —Con mado Esus chuibeneta —caidquo nebi. ² Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquo iquec. Adembidi tantiec nëmbo icquido Esus tantiaquidtedi: —Unësquo iquec —quiosh. ³ Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. ⁴ Matses bëdambo icmequid Esus nec. —Ëbi tantiesabo tabadacimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiacpadec abi tantiaquido cuidmenquo icnuec abided ciudadec Esus unëspac caondash. ⁵ Aidën Papa tantiaquin: —Nuquin Papa bëdamboshë iquec —canuna ënenquo icquin.

Esusuidi tantienquo yanaid

⁶ —Esus tantienquo yanosh —quequin mimbi naid chuisho tantiash shubitiadquo iccobi. ¿Ëbi chonobida badedquo Esus tantienquo yano? Nuquin Papan tantiamiac abided ciudadec unësaid Esus tantiec mibi tabadondac. Aden Nuquin Papa aton Mado Esusbëdta tantiaboedëmbi ¿nëbida Nuquin Papa tantienquo yano? Utsibon icsamboen chiaquien mimbi Esus tantienquo yanac. ⁷ ¿Aidon chiaidta bëdambo icpec? Aidon chiaid

ma Nuquin Papan chiaidpenquio neyoc. Esusquio chien-
 quio icquin muaquin chuisho tantiashun: —Abimboen
 cachitec —queshun mimbi Esus tantienquio yampac.
⁸ —Aton Mado Esusuidtsëqui tantiasho Nuquin Papan
 nuqui bëdamboen isec —quequin abimbo chiondambi.
 —Nuquin Papan chiaid abimbo chienquio icsho Nuquin
 Papan cuidpashuni —quequin aden abimbo chiondambi.
 Nuquin Papan abi yacnoshon uaid mayan bëdantsen
 muaquin chuisho tantiashun aidtsen: —Nuquin Papan
 cuidpashun —catsiambi. Utsibontsen muaquin chuisho
 tantiash aidotsen: —Cuidpashun —quiobi. ⁹ Tantia.
 Adembidi mibi chuinu. Ëmbi chuibanac mimbi Esus
 tantiabenondac. Mimbi tantiondaid Esusquio chien-
 quio icsho: —Nuquin Papan cuidpashun —caimbi mibi
 muauaquin chuiquido. ¹⁰ —¿Matsesën: “Mibi bëdambo
 iquec,” mabi canu —quequindambi aden chuibampadi?
 Padenquio. Nuquin Papan chiacpadomboen mambi nati-
 adquio yoc. —Bëdambo iquec —Nuquin Papa camenuen
 mambi chuibampaboc. Matsesën chiacpadomboenuidi
 natiapimbo iquebi. Adenuidi naic Esuquidistun yuambo
 ictiapimbo ictsiabi.

Esusën chiaidquio chiec nebi, quiaid

¹¹ Tantia, con utsibo. Mibitedi chuinu. —Esus
 tantiasho Nuquin Papan matses bëdamboen isbentsi-
 ash —quequin ëmbi chuiboed amben chiaidpenquio nec.
¹² Matsesën chiabi Esuquidistun tantiamiac ambi chi-
 aidquio chuibanombi.

¹³ Tantia. Aden Esusën ëbi tantiamiondaid mibi
 chuinu. Con matses isadaidbon chiacpadomboenuidi na-
 tiadquio icquin Nuquin Papa tantiesabo danquin Esus tan-
 tiaquido comapenen chieshënquin cuesun secatiadquio
 icpadenebi. Ëmbi adodened ëmbi chuisho mimbi tantion-
 dac. ¹⁴ Nuquin Papa tantiatiadquio icquin con matsesën

chiaid abitedimbo natiadquoio ictenebi. Ĕbēdta tishaidon caniabon bēdiactsēc natiadquoio icnubi con tsusedpabon chiaiduidi natiadquoio ictenebi. Adquid icquin Esus tantiaquido comapenen chieshēndenembi. ¹⁵ Adshobini Nuquin Papan aton Mado Esus tantiamiondash. Ĕbi tishabi icnubi Ĕbi caic: —Con Mado Esus tantiameshun bēdamboen isquin ¹⁶ Pabado: “Matses utsibo isadaidpembo con Mado Esus chuibeneta,” caindambi —quequin ambi chiacpadomboen Esus tantiamiondashi. Adoac: —Esusēn chiaid Ĕbi chui —quequin matses chiambo iccondambi. ¹⁷ Shubu dadpen icquid Edusaden caid yacnocquido Esusbēd icnēdaido ambia Esus chuibanēdaido chuitanambo iccondambi. Utsibo chienquoio yec nidaid utsi Adabia caid yacno matses nibēdacno badedquoio nidtanondabi. Adashic yuec-yuecpambo ictanec auēshquoio choec shubu dadpen icquid Damasco caid yacnobidi choaondabi.

¹⁸ Adashic ambo nidash seta abentsēc chotsecnuc matametanecon Edusaden yacno Petedo isec nidtanondabi. Adec nidash 15tedec ushec aibēd tabadondabi. ¹⁹ Ambobi Nuquin Icho Esusēn utsi Acobo caid isondambi. Esusbēd icnēdaid utsi isambo iccondambi. Aid daēdtsēqui isondambi. Utsibo padambo. ²⁰ Abimbo chuiquin nēid dada uaic nebi. Ĕmbi aden chuibansho tantias: —Ai, abimbo caic —quec Nuquin Papa.

²¹ Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auēshquoio nidshun nidaid utsi Sidisia caid yacno istanondambi. ²² Nidaid utsi Udeya caid yacno Esusbēd icnēdaido yacno yuec tabadambo iccondabi. Adsho anocquidon Esus tantiaquidon isabi iccondashi. ²³ Ĕmbi naid chuishouidi tantiapac caondash. —Nuquipadquid Esus tantiaquido cunesun secatiadquoio icnēdaidēmbi Esus tantiabenshun Esusquoio chuibeniosh —quequin Ĕmbi naid chuishouidi tantiapac caondash.

²⁴ Aden ěmbi naid chuisho tantiash: —Nuquin Papan nac Pabado bĕdambo iquec. Adomboen Pabado tantiamec Nuquin Papa bĕdamboshĕ iquec —quepac caondash Udeya yacnocquido.

2

Edusaden yacno nidoaid

¹ Yuecash seta 14ted matamiash Edusaden yacnobidi nidoapondabi. Ĕbĕdi Bednabe caid nidpondash. Titotsen buanondambi. ² Adec Nuquin Papan tantiamiacpdec ambo nidshun Esus tantiaquido chuiquid dapabo caidouidtsĕqui cho-chomeshun ěmbi naboed chuibanondambi. —Ĕmbi chiabi yac aidon: “Muequi neque. Pabadon chuisho tantienda,” canushe —qeshun naden chiondambi. —Nuquin matsespenquio isadaidpembo matses utsibo Esusquio chuibenioniombi. “Esusuidi tantiasho Nuquin Papan nuqui bĕdamboen istsiash,” quequin chuibenioniombi. *¿Adembidida mimbi tantiape?* —capondambi Esus tantiaquido chuiquid dapabo chuiquin. Ĕmbi adoac: —Ai, adembidi tantiembi —quepondash aido. ³ Ĕbĕd icquid Tito caid isadaidpembo icshobi: —Shui dĕbid dĕteshune —cainquio iccondash chuiquid dapabon abi utsibon: —Adotiad —canubi. ⁴ Adec: —Shui dĕbidien dĕteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Esusuidtsĕqui tantiasho Nuquin Papan nuqui bĕdamboen isec,” quequin con tsusedpan chiaid niacsho tantianu —quiash ěbi yacno puduedpondash. Adec puduedshun tantiashic: —Mimbi icsamboen chiec. Nuquin tsusedpa Moisesĕn chiampidtedi nasho Nuquin Papan bĕdamboen istsiash —quepondash. ⁵ Adec aido: —Nuquin tsusedpan chiampicpadomboenuidien

nametiad —quesho: —Padi. Mimbi icsamboen chiec — quequin aidën chiacpadomboen nainquio iccondambi. — Ma matses utsibon: “Esusënuidtsëqui Nuquin Papa ëbi bëdamboen ismec,” quequin ma Esusquio tantianu — qeshun nainquio iccondambi.

⁶ Aden Esus tantiaquido chuiquid dapa caidon Esus tantiaquidën natequid utsi chienquio iccondashi. —Esus tantiabencsho isun nuquin tsusedpan chiacpadomboentsen nameta —quequin chienquio iccondashi. ¿Esusbëd icnëdaidën: —Moisesën chiaidtsen nameta —cactambi nametsemponda? Padenquio icctsenondambi. ¿Atotsi Nuquin Papan aido capec? —Esusbëd iccondaidquio neque. Bëdamboen isnu —¿capenda iquec? Padenquio. ⁷ Naden Petedo chedon chiondashi. —Nuquin Papan chiacpadomboen mimbi matses utsibo isadaidpembo Esusën naid chuibeniac. Nuquin Papan chiacpadomboembidi Petedon nuquin matses isadaidbo Esusën naid chuibeniosh. Petedon nacpadomboen mimbi bëdamboen nac —capondashi. ⁸ —Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbitsen matses utsibo dadpen Esus tantiamiac ⁹ —qeshun bëdamboen ispondashi. — Adembidi nanuna. Mimbi isadaidpembo Esusën naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquio mibinec —qeshun chuiquid dapabon Bednabebëdta mëdimbampondashi. Nëidic Petedo. Nëidic Acobo. Nëidic Uan. Aidtedishun chuiquid dapabo icquin adondashi. ¹⁰ Nadentsen chuipondashi. —Aton na nibëdquido bëdamboen isnuna —capondashi. Adsho tantiaish: —Ai, adonona —quepondabi. Adanec nidpondabi.

Antioquiya yacnoshon Petedo chushcaid

¹¹ Adash yuectaniash ëbi iccondacno shubu dadpen icquid Antioquiya caid yacno Petedo chopondash. Auëshquio icsashobimbi bëisquioquin chushcapondac. ¹² Abëdtan Esus tantiaquido matses utsibon codocaid pec bëdamboec tabadboedi aton pete isuidanec aidobëd cuëshëdec Petedo icsapondash. Ambo choash Esus tantiaquido con matsesëmpenquio codocaid pec bëdamboec tabadondash. Adnubien Acobon: —Ambo istan —cac con matses Moisesën chiampid tantiaquido chopondash. Aido cho-chosho isash: —Moisesën chiampid niacquin matses utsin codocaid pesho chushcanushe —quec dacuëdquin isadaidpembon pete meniaid isuidampondash Petedon. Adec abëdtan Esus tantiaquido matses utsibobëd cuëshëdec icsapondash. ¹³ Adsho isash anocquido isadaidbotsen abëdtan Esus tantiaquido matses utsibobëd tabadenquio yec cuëshëdpondash. Adsho isash ëbëd icquid Bednabetsen adecbidi cuëshëdec icsapondash. ¹⁴ Adec icsaquin Esusën chiacpadomboen nainquio icshobimbi Petedo chushcapondac Esus tantiaquidtedishun tantianuc. —¿Ada mimbi bëdamboen naoque? Tantia. Chuinu. Isadaidbo tsusedpan chiaid matses utsibo mimbi namec. Isadaidbo icquimbi matses utsibon codocaid pec aidbëdi mibi bëdamboec tabadoc. Aidon piaid pec bëdamboec tabadboedi nëbi aidbëd mibi cuëshëdoc. Adsho isash mimbi nianaïdo: “Petedon matses isadaidbo tabadacbimboec tabadshouïdien Nuquin Papan nuqui bëdamboen ischitotsiash,” quepec icsamboen chiec. Aden mimbi icsamboen tantiamëque. Tantia. ¿Atotsiequin mimbi naoque? —capondambi Petedo chushcain.

Nuquin Papan bëdamboen iste chiaid

¹⁵ Naden con matses Petedo chiondambi. —“Moisesën chiampicpadomboen naisabo matses utsibo icsambo

iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dēbid dēteshun secanēdaido nec. ¹⁶ Adquid icquin: “Moisesēn chiaiduidi naquin Nuquin Papa bēdamboen ismembi,” quedenedi nēbi nuqui utsien chiec. “‘Abided cuidadaid Esusēnuidtsēqui Nuquin Papa ēbi bēdamboen ismec,’ quequin Esus tantiasho Nuquin Papan nuqui bēdamboen isec,” quequin nuqui tantiec. Adshun matses utsibobēdtambi nuqui Esus tantiaquiec. “Moisesēn chiaid niaquesa nibēdsho isun Nuquin Papan matses abitedi bēdamboen istiapimbo iquec,” quequin tantiashun nuqui bēdamboen ismequid Esus nuqui tantiabenondac — quequin Petedo chiondambi.

¹⁷ Adashic Petedobidi chui-oaic: —“Esusuidi tantiasho Nuquin Papan nuqui bēdamboen istsiash,” queshun Esus tantiabenondacsho nuquin matsesēn icsambo capondashi. “Nuquin tsusedpan chiacpadomboen nainquio yec mibi icsambo iquec matses utsibobimboec,” capondashi nuquin matsesēn. ¿Ada Esuquidistun matses icsambo icmepec? ¿Ambi chiacpadomboen naicta nuqui icsape? Padenquio. ¹⁸ “Nuquin tsusedpan chiampicpadomboen nashoen Nuquin Papan nuqui bēdamboen isec,” quequin nuquin matsesēn chiaid nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaiduidi naquin Nuquin Papa bēdamboen ismembi,” queshun abi bēdamboen ismequidquio Esus tantienquio yequini icsambo icchitotsiac. ¹⁹ Con tsusedpa Moisesēn chiactedi natiadquio ictenebi. Adquid bēdamboen iste danquin abitedi natiadquio icquimbi abitedi nainquio iccondambi. Adshun: “Moisesēn chiactedi ambembi matsesēn natiapimbo iquec,” queshun ěmbimbo naid ěnondambi. Nēbini Esus tantiec Nuquin Papan chiacpadec tabadec. ²⁰ “Ambi con tsusedpa

Moises chuimiactedi nashouidi Nuquin Papan nuqui bēdamboen istsiash,” quedenedi Esus tantiec adenquo yanondabi. Nēbi ěmbi tantiaidquo nainquo yec Esuquidistubēdi cuēshēdenquo yec bēdamboec tabadebi. “Ĕbi tantiec ěbi cuidmenquo icnuec abided cuidadec unēsac caondash,” quequin tantiashoeni Esusēmbi bēdamboec tabadquid icmec. ²¹ “Abided cuidadaid con Mado Esusuidi tantiasho matses bēdamboen isendambi,” quequin Nuquin Papan chuipanēdash. Aden Nuquin Papan chiaid niactiapimbo iquebi. Moisesēn dada uapampid ambi chiaid niaquesa icsho Nuquin Papan bēdamboen istsenac. Ambi chiaid niaquesa nibēdec. Adquid Nuquin Papan chiaid niaquesa icnuc: “Matses cuidmenquo icnuec ěbided cuidadec unēsnu,” queboedi Esus padenquo ictsempañēdash —capondambi Petedo chuiquin.

3

Nuquin Papan aton Mayan tabadmiaid

¹ Tántia. —Cadasia yacnocquido piushbimboecquin tantienquo yanosh —quequin chuisho tantiashun mibitedi chuinu. ¿Tsuntsin: —Tantienda —cac Esus tantienquo yano? —“Cuesten dectanac abided cuidadaid Esusēnuidtsēqui Nuquin Papa nuqui bēdamboen ismec,” quequin Esus tantiasho Nuquin Papan nuqui cuidenquo iquec —quequin mibi chuibanondambi. ¿Esus tantiatiapimboda ique? ² Mimbi tantiaid ěbi chui. Tántianu. ¿Atotsi quiash Nuquin Papan Mayan mibēdi tabadanondash? ¿Nuquin Papan ambi chiaid Moises dada uamepampid mimbi nabanuda mibēd tabadanondash? Padenquo. Ĕmbi chiondaid Esusquo mimbi tantiabensho isashien mibēd tabadanondash. ³ ¿Pabiate shēcuē choquidida mibi nendac? Tántia. ¿Atotsieshun tantienquo ique? Mibēdi tabadquin Nuquin Papan Mayanēn

mibi bēdamboec tabadquid icmec. ¿Nēbi Esus tantienquio yanecta mibi bēdamboec tabadpatsia? Mibembi bēdamboec tabadtiapimboen mibi iquēc. ⁴ ¿Aden Nuquin Papan aton Mayan mibēdi tabadmiaid icquimbida Esus tantienquio yano? ⁵ Nuquin Papan aton Mayan mibēdi tabadmequin comapenen tantiaquin nacnenquin mibi ismiondash. ¿Atotsieshun Nuquin Papan aton Mayan mibēdi tabadmec? ¿Con tsusedpa Moisesēn chiampid nashoda Nuquin Papan aton Mayan mibēdi tabadmec? Padenquio. Ĕmbi chiondaidquio Esusquio tantiaشو Nuquin Papan aton Mayan mibēdi tabadmec.

Nuquin Papa tantiaquidquio Abadauan chiaid

⁶ ¿Tsutsi Nuquin Papa tantiaquidquio icpampic? Abadauan nepampic. Nuquin Papan chiac Abadauan: —Abimbo mimbi caic —quesho: —Adquid bēdamboen isembi —queshun Nuquin Papan bēdamboen isbempampic. ⁷ Adec Abadauan: —Nuquin Papan abimbo caic —quequin tantiapampicpadomboen nēbi matsesēn Esus tantiaشو Nuquin Papan bēdamboen isendac ambi Abadauan ispampicpadomboen. ⁸ —Esus tantiaquido iquendac —quequin naden Nuquin Papan Abadauan chuipampic ěndenquimbo. “Abadauan, mibi unēsan yuecquimbo ictaneshun min tsyuecquid abentsēc tantiaquidtedi bēdambo icmendambi. Nidaid utsi-utsiec yacno tabadquidon min tsyuecquid abentsēc tantiaشو bēdambo icmendambi,” quequin Nuquin Papan chiaid con tsusedpan dada uapampic. ⁹ Abi tantiaquidquio icsho ambi Abadauan bēdamboen isampicpadomboen nēbi aton Mado Esus tantiaشو Nuquin Papan nuquitsen bēdamboen isec.

¹⁰ Utsiboen Nuquin Papan cuidtequido nendac. — Moisesēn chiampicpadomboenuidi nasho Nuquin Papan

bëdamboen istsiashi —quequidëmbi abitedimbo nainquio icsho Nuquin Papan cuidendac. Aden ënden Nuquin Papan chiaid dada uapampic. “Ambi chiactedi nainquio icsho Nuquin Papan cuidendac,” quepampic. ¹¹ — Ambembi Moisesën chiampicpadomboenuidi nasho matses bëdamboen isendambi —¿quecta icpanëdash Nuquin Papa? Padenquio. Ambi chiaid niacquidoudquio icsho bëdamboen istiapimbo icquin Nuquin Papan naden chuiquin dada uamepampic. “ ‘Nuquin Papa ambi chiacpadomboen naquidquio nec,’ quequin abi tantiec tabadquidien Nuquin Papan bëdamboen isec,” quequin dada uamepampic. ¹² ¿Ëmbembi Moisesën chiactedimbo nanuequidta Nuquin Papambo tantiec tabadpec? Padenquio. “Moisesën chiactedi naquid Nuquin Papabëd tabadendac,” quequin chiampicpaden ambembi matsesën natiapimbo iquec. Natiapimbo icsho Nuquin Papan bëdamboen istiapimbo iquec.

¹³ Aden Nuquin Papan matses abitedimbo bëdamboen istiapimbo icnuc Esuquidistu: —Ëbided cuidshun ëbi tantiaquido ma con Pan cuidenquio icnu —quiash abided ciudadec unëspac caondash cuesten dectanac. Aidquio chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquio nec,” quequin Nuquin Papan chiaid dada uapampic. ¹⁴ Adec matses utsi-utsien abi tantiaquido cuidmenquio icnuec abided ciudadec Esus unëspac caondash. Ëndenquimbo con tsusedpa Abadauan chiec: —Yuecshun bëdambo icmendambi —quequin Nuquin Papan chuiampicpadomboen abi tantiaquido bëdambo icmequin aidobëdi aton Mayan tabadmenuec Esus unëspac caondash.

Abadauamba chuishun Moisessten Nuquin Papan chiaid

¹⁵ Tantia, con utsibo. Mibitedi chuinu. Min matsesën nadoquid. —Naden naindambi —quequin dada

uashun: —“Abimbo chiaidquio nec,” ma isquidon canu —queshun abi cuëmëdquidtsen dada uaquid. Aid dada uaid dada uaquidbëdtambi utsintsen utsi uatiapimbo icquid: —Chuiquidën cuidnushe —queshun. Adembidi ambi chiaid utsi uatiapimbo icquid icquin ¹⁶ Nuquin Papan: —Nadomboen naindambi —quequin Abadauan chuipampic. —Mibi nibëdanan yuecquimbo ictaneshun min tsyuecquid abentsëcshun matses bëdambo icmendac —quepampic. —Min tsyuecquid abentsëc tanti-aquidtedi bëdamboen isendambi —quequin tantiec adpampic. Esus caiqui: —Min tsyuecquid abentsëc —quec adpampic. —Min matses tsyuecquido dadpen —quenquio icpampic. ¹⁷ ¿Ada tantie? Ëndenquimboshë Nuquin Papan Abadauan chuiquin: —Min tsyuecquidën matses bëdambo icmendac —capampic. Adshumbic yuecquio ictaneshun seta dadpenquio 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquio icquin Nuquin Papan ambi chiaid utsi Moises dada uamepampic. Muenquio icquin Abadauan chuipampic. ¹⁸ ¿—Ëmbi chiaid ëmbi Moises dada uamiacpadomboen nashouidi mibi bëdamboen isembi —queshunda Nuquin Papan Abadauan bëdamboen isbempampic? Padenquio. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bëdamboen isbempampic. Adashic: —Yuecshun min tsyuecquidën matses bëdambo icmendac —quepampic. Aden ambi ëndenquimboshë chiampicpadomboen nëbi matses bëdambo icmequin Esus tanti-aquido Nuquin Papan bëdamboen isec.

¹⁹ ¿Atotsieshun Nuquin Papan ambi chiaid Moises dada uamepampic? —Ëmbi chiaid isash: “Icsamboequien nuqui tabadchitec,” quequin ma matsesën tantianu —queshun Moises dada uamepampic. Nuquin Papan

Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bēdabon Moises chuiuampampic. Adoac Moisesēn aton mattses Nuquin Papan chiaid chuibampampic. ²⁰ Nuquin Papanquio Abadauan chuipampic. Abadauan caic: — Chuitan —cainquio icquin Nuquin Papanquio Abadauan chuipampic.

Mattses abi icsaid tantiamete chiaid

²¹ Aden Nuquin Papan Abadauamba chuishumbic Moisesen chuipampic. ¿Ambi: —Min tsyuecquid tantiaquido bēdamboen isendambi —quequin Abadauan chiampid niacquinda Nuquin Papan Moises chuipampic? Padenquio. ¿Mattses bēdamboen isnuenda Nuquin Papan ambi: —Naden nata —quequin chiaid Moises dada uamepampic? Padenquio. —Mattses bēdamboen isnu —qeshun ambi chiaid Moises dada uameshun ambi chiaid niaquesa bēdamboen isun unēsacsho abēdi tabadmet-siash. —Ēmbi chiaid niaquesa nibēdendac —quequin tantiaquin ambi: —Naden nata —quequin chiaid Moises dada uamepampic. ²² —Ēmbi chiaid isun: “Nuquin Papan chiaid mattses abitedishunquien niac-niacchitec. Mētaniac abembi mēnchiquidtiapimbo yac bimboec abembi bēdambo ictiapimboen icchitec,” quequin ma mattsesēn tantianu —qeshun Nuquin Papan Moises dada uamepampic. Adec mattses abitedi icsamboec tabadsho bēdamboen istiapimbo icquimbi ambi Abadauan chiampicpadomboen naquin Esuquidistu tantiaquidouditsēqui Nuquin Papan bēdamboen isec.

²³ Esus choabi icnuc nadquio mattses icpanēdash. Moisesēn chiacpadomboenuidi natiadquidi abembi bēdamboec tabadtiapimbo icpanēdash. Mētaniac mēnchiquidtiapimbo yac bimboec aidēn chiacpadec bēdamboec

tabadtiapimbo icpanēdash. Nuquin Papan Esus tanti-
amiabi icnuc adquio matses icpanēdash. ²⁴ Aden: —
Ambi chiaid niaquec icsamboec tabadsho Nuquin Pa-
pan ěbi bēdamboen istiapimbo iquec. ¿Nuquin Papa
bēdamboen ismequidta nibēdpeba? —nuqui camenuen
ambi chiaid Moises dada uamepampic. Aden nuqui ic-
said tantiameshun Esustsen tantiamiac: —Esus tantiasho
Nuquin Papan nuqui bēdamboen isec icsaisabimboecnuc
—nuqui quendac. ²⁵ Aden tantiec: —Isadaidbo tsusedpan
chiactedi nashouidi Nuquin Papan matses bēdamboen
istsiash —quenquio nuqui iquec. —Esus tantiasho Nuquin
Papan nuqui bēdamboen isquin bēdamboen tabadmec —
quequin nuqui tantiec.

Nuquin Papan con mado con champi caido

²⁶ Aden Esus tantiasho Nuquin Papan: —Con mado mibi
nec. Con champi mibi nec —nuqui capec. ²⁷ Adec: —
Esus tantiaquid nebi —quesho acten mentoaid yec Esus-
padquio ictiadquio nuqui iquec. ²⁸ Aden Esus tantiasho
Nuquin Papan nuqui bēdamboen isec. Isadaidbo yec
isadaidpembo yec matses yuaido yec matses yuapen-
quio yec dada yec chido yec quequin Esus tantiasho
nuqui bēdamboen isec. —Matses utsibo bēdamboen
istiapimbo iquebi —quenquio icquin matses utsibombi
aton Mado Esus tantiasho Nuquin Papan bēdamboen isec.
²⁹ Adembidi abi tantiasho ambi Abadauan bēdamboen
isampicpadomboen Esus tantiasho Nuquin Papan nuqui
bēdamboen isquin bēdambo icmec ambi Abadauan chi-
ampicpadomboen. Adec Abadauanĕn tsyuecquidobim-
boecquido nuqui nec.

¹ Tantia, con matses. Mibitsen chuinu. Aton na dadpen dayun uaquidën nuquin matsesën nadoquid. — Èbi unësan con madon con na abitedi bedendac. Bacuë icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidën amën aton mado aden chuiquid. Aton papa unësan caniabi yec utsibon yuabimboec aton mado iquec. ² Caniabi icquin utsibon chiacpadomboen naindac aton madon. Adashic aton papan chiacpadec canishun aton papan na bedash yuabimboecboedi adquidpenquio yanendac. ³ Adquio yuabimboecquido con matses isadaidbo icpanëdash. Tsusedpabon yuabimboecquido icquin Nuquin Papan bëdamboen iste bëdamboen tantienquio icpanëdash. —Tsusedpabon chiacpadomboen Nuquin Papan: “Naden nata,” quequin chiaiduidi nanu —quiashi abembi bëdamboec tabadtiaximbo icpanëdash. ⁴ Adnubien ambi ëndenquimbo tantiampicpadën Nuquin Papan Esus chomepanëdash. Isadaidbon chidon tishaid icquin Nuquin Papan: —Naden nata —quequin chiaid naquidquio Esus nepanëdash. ⁵ Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanëdash. Adsho isash matses cuidmenquio icnuec abided ciudadec Esus unësan caondash. Nëbi Esus tantiasho: —Con mado mibi nec. Con champi mibi nec —quequin Nuquin Papan nuqui bëdamboen isec.

⁶ Adec: —Con bacuëbo nec —queshun Nuquin Papan nuquibëdi Esusën Mayan tabadmec. Adoac bacuën amë: —Èbi, papa —cacbimboen Nuquin Papa nuqui chinec. ⁷ Esus tantiabi Moisesën dada uapampiduidi namenuquido yuabimboecquido icboedi nëbi Esus tantiasho Nuquin Papan: —Con bacuëbo nec —nuqui capec. Aden nuqui bëdambo icmec ambi Abadauan chiampic-

padomboembi.

¿Utsin yuameteda bumpe? quiaid

⁸ Tántia. Nēbi matses utsibo mibi chuioanu. Ęnden Nuquin Papambo tantiesa icquin matses uaquidpenquiobi utsi mimbi tantiapanēdac. Papa quequin mimbi tantianē-daidēn yuabo yec mētaniacimboecquido mibi icpanēdac.

⁹ Nēbi Nuquin Papa mimbi tantiabenondac. ¿Mimbembida adonda? Padenquoio. Aidēmbi mibi tantiamepanēdash. Aidēn tantiamiaidombo icquin ¿atotsiequin aid tantienquoio yanoai? ¿Moisesēn dada uapampiduidi namenuequido tanshoda Nuquin Papan mibi bēdamboen ispec? Padenquoio. Adquid mētaniacimboecquid nec. ¿Mētaniacimboecquid icoatiadquioda ique? ¹⁰ Aden Nuquin Papa tantienquoio icquin mimbi icsamboen chiec. —Aid badiadēn adenda. Aid inchēshēn ushēn adenda. Aid setambi adenuidtsēqui nanuna. Nuquin Papan cuidnushe —quequin mimbi icsamboen chiec. Mimbi chiacpadomboen naquid Nuquin Papan bēdamboen iste danquin mimbi icsamboen chiec. ¹¹ Mibi caic: —Adosh —quesho tantia shubitiadquoio iquebi. —¿Ęmbi chiondaidonda Esus tantienquoio yampash? —quequin tantiac mibi unēsquoio iquec.

¹² Con utsibobimboecquido mibi neque. Tántia. Mibitedi chuinu. Isadaidpembo yec mibi: —Moisesēn chiampiduidi nanu —quenquoio yacimboec yanondabi. —Ęmbembi Moisesēn chiampid naquin Nuquin Papa bēdamboen ismembī —quedenedi ěnēdondabi. Nēbi Esusuidi tantiaquid nebi. Adembidi Esusuidi tantiaata.

Ębi adsho tantia sh chieshenda. Tauamboen ěmbi Esus chuisho mimbi ěbi chieshēnenquoio iccondac. ¹³ Mibi yacno tauamboec choshon daicsabudtsēcshumbi mibi Esusēn naid chuibanondambi. ¹⁴ Istiapicpambo yec daicsabudacshobi mimbi ěbi cacumenquoio iccondac. Ębi mibi

yacno puduedsho isash mibi cuishonquiondac. Nuquin Papan abi yacnoshon uaid mayan bēda choacbimboec-nuc mibi cuishonquiondac. Nuquin Icho Esuquidistu choacbimboecnubidi mibi adondac. ¹⁵ —Min ēshē chichun ēbi mene —ēmbi cac mimbi ēbi menetsenondac. Aden ēbi mimbi tantiaquiondac. Adondaiddi ¿atotsi quiash chieshcueno? ¹⁶ ¿Nēid abimbo chuiquindambi mibi chieshēmpē? Padenquo iquemi. ¿Aden chuisho mimbidabi chieshēmpē?

¹⁷ Ista. Esus chienquo icquidon ambi chiacpadomboen mibi nametiadquo iqueque. ¿Mibi tantiaquiquin bēdamboen namenuenda mibi chuipec? Padenquo. Ēbi chieshēmenuembien ambi chiacpadomboen mibi nametiadquo icchitec. Mibi abibi tantiamenuenaic. ¹⁸ Ēmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbi ēmbi chiaidquo tantiabenondac. Ēbēd icquimbi Esus bēdamboen tantiaboedombi ēbi nidtsēcnubi mimbi badedi utsi tantiac. ¹⁹ Aden mimbi naid tantiac mibi unēsquo iquec. Anin bacuē tantiacbimboen mibi tantiaquiemi. —Esubimboec icpashun. Aid tantiec ambi chiacpadec bēdamboec tabadpashun —quequin mibi tantiemi. ²⁰ Mibēd icquin bēisquioquin mibi chuitsiambi. Mibēd iquenquo icquimbi mibi bēisquioquin chiacbimboen dada uaquin mibi naden chiemi. — ¿Atotsieshun Esus tantienquo yanoao? —caimbi.

Abadauanēn mado daēd chiaid

²¹ ¿—Moisesēn chiacpadomboenuidi naquin Nuquin Papa bēdamboen ismimbi —quequido icquinda mimbi Moisesēn chiampid bēdamboen tantieque? Tantia. Mibi chuinu. ²² Naden chuiquin Moisesēn dada uapampic. Abadauanēn madombo daēd icpampic. Aton chidon yuaid chido bedshun tishmiaid abentsēc icnuc aton

shanunquio aton chidon tishaid abentsëcbidi icpampic. ²³ Abadauanën chudac badedquio bacuë usundoshon chido yuaidën aton mado tishpampic. Abadauanën chidombo naido icsho: —Mimbi bacuë tishendac — quequin ambi chiacpadomboen Nuquin Papan naidopenquio icmiac aton mado tishpampic. ²⁴⁻²⁵ Aidi Sada nepampic. Chido yuaid Acad nepampic. Aidën tishaid yec aton mado yuabidi nepampic. Icbon chiacpadomboenuidi napampic. Yuaidën madobimboecquido Moisesën dada uapampiduidi namenuequido nec. Adquibidi Edusaden yacnocquido iquec. Esus tantienquio yec Moisesën chiduidi tantiate bunquiec. Nidaid utsi Adabia caid yacno macuësh dapa Sinai caidëshun Nuquin Papan ambi chiaid Moises dada uamepampic. Aid macuësh matses utsin Acad capec. Aden tantiaquin: —Chido yuaid Acad caidën madobimboecquido Moisesën dada uapampiduidi namenuequido nec —caombi. ²⁶ Edusaden caid utsi iquec. Nuquin Papa tabadacnombo Edusaden caoapec. Ambo Esus tantiaquido yec nuquibi tabadendac. Yuaidën madobimboecquido Moisesën dada uapampiduidi namenuequidoen padenquio iquendac. ²⁷ Nuquin Papan ambi chidaid dada uamepampicpadec Esus tantiaquido dadpenquio iquendac. Naden dada uamepampic.

“Tantia, chido. Naido icsho mibi chuinu.

Bacuë tishtiapimbo yequi bëdambo icta.

Bacuë paëmbo icnuc tishacmaid yequi cuishonqueta.

Bënë choquidën bacuë dadpen tishquidën bacuën tsyuecquido daëdpactsëc yanubi

Bacuë nibëdquidën min matses dadpenquioshë yanendac,”

quequin ambi chiaid Nuquin Papan dada uamepampic.

²⁸ Tantia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido

iccondaidën tishaid Isac cuëmëdquidën tsyuecquid tantiaquido bëdamboen isendambi —quequin Nuquin Papan Abadauan chuipampic. Abadauan chiacpadomboen aton Mado Esus tantiasho Nuquin Papan: —Con mado nec. Con champi nec —nuqui caindac. ²⁹Ënden Nuquin Papan naidopenquio icmiampidën mado chieshënquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuequidon chieshë-nendac. ³⁰Aden Abadauanën mado bëyucquidën aton utsi chieshënsho isun ¿atotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobëdtabi cueme. Min mado utsi Sadan madon tsyuecquido dadpenquio caidmequin bëdamboen tabadmembï. Yuaidën madoembï padenquio iquendac,” quequin Nuquin Papan Abadauan chiaid dada uapampic Moisesën. ³¹Sada caidën mado Isac caidpadquid yuapenquio nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. — Esusënuidtsëqui Nuquin Papa ëbi bëdamboen ismec —quequin Esusquio tantiaquid yec: —Ëmbembï Moisesën chiactedi naquin Nuquin Papa bëdamboen ismembï —quenquio icnuna.

5

Esus tantiasho Nuquin Papan bëdamboen iste chiaid

¹Aden: —Esusënuidtsëqui Nuquin Papa ëbi bëdamboen ismec —matses camenuec abided ciudadec Esus unëspac caondashe. Aidquio tantiata. Muaquidën: —Moisesën chiampicpaden nasho Nuquin Papan nuqui bëdamboen istsiashe. Aidën chiacpaden nanuna —quequin chuisho tantienda. Aden muaquin chiacpaden naic isadaidbo tsusedpan yuabimboec mibi yantsiaque.

² Mimbi ison daid Pabado nebique. Tantia. Mib-
 itedi chuinu. Moisesën chiac tedi naquid Nuquin Pa-
 pan bēdamboen iste danquin Esus tantienquo yanec
 muaquidēn chiac padec shui dēbid dēteshuniadacsho isun
 Esusēn Nuquin Papa mibi bēdamboen ismetiapimbo ict-
 siashe. Adenda. ³ Aden Moisesën chiaid abentsēc
 natsēcshun aidēn chiaid utsitedi nainquo icsho Nuquin
 Papan mibi bēdamboen istiapimbo ictsiashe. Moisesën
 dada uapampiduidi namenuquido tanenda. ⁴ Aido Esus
 tantiesabo nec. Aden abi bēdamboec ismianquid Esus
 tantienquo icsho Nuquin Papan aido bēdamboen is-
 tiapimbo iquec. ⁵ Esus tantiaquidoen Nuquin Papan
 Mayanēn tantiamiacpaden naden tantiec. —Esus tan-
 tiashouidi ambi chiaid niac-niacacmaidbimboecnuc bē-
 damboen isquin Nuquin Papan: “Mibi bēdambo iquec,”
 nuqui caindac —quequin nuqui tantiec. ⁶ Shui dēbid
 dēteshuniadēn Esus tantiasho Nuquin Papan bēdamboen
 isec. Adembidi shui dēbid dētiacmaidontsen Esus tan-
 tiasho Nuquin Papan bēdamboen isoaic. Aden Esus
 tantiabenash: —Ambi chiac padomboen Nuquin Papan
 matses tantiaquid ēbi icmendac —quequin aden utsibo
 tantiasho isun Nuquin Papan: —Adquid con Mado tanti-
 aquid nec —caindac.

⁷ —Bednu —quequin nadancac bimboen aiduidtsēqui
 tantiaquin mimbi Esusquo tantiondac. ¿Tsuntsin
 muaquin chiac Esus tantienquo mimbi yanoape?
 ¿Atotsiequin abimbo chiaid niacpe? ⁸ ¿Nuquin Papan
 nacta Esus tantienquo yano? Padenquo. Ma aidēmbi
 mibi Esus tantiametiadquo yoc. ⁹ Muaquido tantienda.
 Nadquo aid iquec. Tosho bedquid abentsēcshun
 bedmebanac abitedi toshoquecuededec. Adembidi
 muaquid abentsēcshun chiac matses dadpeshun abimbo
 tantienquo yantsiashe. Muaid tantienda. ¹⁰ —Nuquin

Icbo Esusën tantiamiac ëmbi chiacpadomboen Cadasia yacnocquidon tantiatsiash —quequin mibi chiec nebi. Mibi muaquin chuiquid Nuquin Papan cuidendac.

¹¹ —“Con tsusedpan chiacpaden shui dëbid dëteshuniaiduidtsëqui Nuquin Papan bëdamboen istsiash,” queposh Pabado —quequin ¿tsundanquieni muauapac caosh? ¿Adendambi chuidio? Aden ëmbi chuisho adembidi chuiquidon chieshënenquio ictsenoshi. Esus chienquio icsho ëbi chieshënenquio ictsenosh. Abi tantiaquid cuidmenquio icnuec abided ciudadec unësaid Esusuidi chuisho mabi chieshëmpaboc. ¹² Mibi muaquin chuiquido Moisesën dada uapampiduidi namenuequido caic: —Auëshquio cuemepashun —caimbi.

Esus tantiaquido bëdamboec tabadte chiaid

¹³ —Ëbi cuidmenquio icnuec abided ciudadec unësaid Esusquio tantiasho Nuquin Papan ëbi bëdamboen isec —camenuen Nuquin Papan mibi Esus tantiamiac. Adoac: —Esus tantiasho Nuquin Papan cuidtiapimbo iquebique. Ëbi icsate bunaid nanu —quenda. Nëbi Esus tantiaquin mibi icsate bunaid ënquin mëmunta. Esus tantiaquido yec tantiananquieci nashunanta. ¹⁴ Adomboen Nuquin Papan Moises naden chuimiapadomboen mimbi natsiac. “Mibibi min dada datantiadac bimboen utsibotsen bëdamboen tantiaquiota,” quequin Nuquin Papan ambi chiaid Moises dada uamepampic. ¹⁵ —Opa penantiadpambo yac bimboec nëishnanash chushcananosh —quiosh mibi caic. Aden naic mibi icsacuededeque. Esus tantienquio mimbi yaneque. Bëdamboec tabadta.

Nuquin Papan Mayanën bëdamboen tabadmete

¹⁶ Nuquin Papan Mayanën tantiamiacpadomboen naic bëdamboec tabadta. Aden mibi icsate bunaid mimbi nainquio ictsiac. ¹⁷ Nuqui icsate bunaid naiqui Nuquin

Papan Mayanën tantiamiacpadec bēdamboec tabadtiapimbo nuqui ictsiac. Nuquin Papan Mayanën tantiamiacpadomboen tantiaquin nuqui icsate bunaid ēnquin nuqui mēmuntsiac. ¹⁸ Nuquin Papan Mayanën tantiamiacpadomboen tantiec: —Esusēnuidtsēqui Nuquin Papa ēbi bēdamboen ismec —qeshun: —Moisesēn chiatedimbo naquin ěmbimbo Nuquin Papa bēdamboen ismēmbi —quequin tantienquo nuqui iquec.

¹⁹ Nadquo icsateuidi bunquid matses iqueque. Tanti. Chuinu. Nēidic aton chidopenquo chudquido. Nēidic aton bēnēpenquo chudmequido. Nēidic dada daēd chichudnanquido. Nēidic opabimboec chudnante bunquin matses ismequin adoquido. Nēidic tsienbēdta shui chuibudquin icsamete bunquido. ²⁰ Nēidic Nuquin Papan chiaid niac-niacquin ambi matsesbimboecnuc nacnēnāidi papa caquido. Nēidic nēnēchoquido. Nēidic dauē icsa bedash icsa uanquido. Nēidic chieshēmēnquido. Nēidic chieshēmēnec chushcananquido. Nēidic cudasquido. Nēidic nēishēmēnquido. Nēidic ambi naiduidi naquido. Nēidic abitedi cuēsh-cuēshēdmianquido. Nēidic: —Utsin chiaid tantiatiapimbo iquebi. ěmbentsēqui bēdamboen chiēmbi —quequido. ²¹ Nēidic utsin na natiambo bunec chieshēmēnquido. Nēidic tantiadenuen paēmbō icquid acquido. Inchēshēn ushenquo icquin adoquido. Adquidtedishun icsamboen naic. Adec abi icsaid ěntiapimbo yec unēsash Nuquin Papa yacno tabadtiapimbo iquec. Aden mibi chuibanondambi ěnden.

²² Padnuen Nuquin Papan Mayanën namiaid yec nadquiec tabadquid. Nuquin Papabēdta matses tantiacquiec tabadquid. Esus tantiec cuishonquec tabadquid. —Nuquin Papan ēbi bēdamboen isec —quec bēdambo yec dacuēdenquo yec tabadquid. Utsibon chieshēnaqui chieshēmēnenquo yec tabadquid. Nēishēmē-

nenquoio yec tabadquid. Bëdamboen isquin utsibo nashunec tabadquid. Muainquoio yec tabadquid Nuquin Papan namiaid. ²³ —Con nauidi naimbi. Èbiuidtsëqui bëdambo iquec —quenquoio icquin utsibo bëdamboen tantiec tabadquid. Abi icsate bunaid ënquin mëmunec tabadquid. Adquoio yec Nuquin Papan Mayanën nami-aido Esus tantiaquido bëdamboec tabadtsiash. ¿Adec bëdamboec tabadsho isunda: —Adec tabadenda —quequin Nuquin Papan Moises dada uamepampic? Padenquoio. —Icsamboec tabadenda —quequin icsamboec tabadquid chui-pampic. Nuquin Papan Mayanën tantiamiacpadec tabadquin aden chui-pampid nuqui niaquenquoio iquec. ²⁴ Adoenquoio icquin cuesten dectanac abided ciudadec unësaid Esus tantiaquin nuqui icsate bunaid ënquin nuqui mëmuntsiac. ²⁵ Aden icsamboen nainquoio yec bëdambo icnuna. Nuquin Papan Mayanën Esus tantiamiaid icquin aidën tantiamiacpadomboen nanuna.

²⁶ —Èbiuidtsëqui bëdambo iquec —quenda. Aden-quoio yec nuqui chuiquid dëniacte bunenquoio yec bëdamboec tabadnuna. —Èbi bunacpaden ëbi namianen-qui-en icchitec. Utsien namechitec —quec chieshëmë nec tabadenda. Nëishnanenquoio yec bëdamboec tabadnuna.

6

Esus tantiaquido bëdamboec isnante chiaid

¹ ¿Nuquin Papan Mayanën tantiamiacpadomboen bëdamboen tantiaquidta icpec? Adquidën abëdtan Esus tantiaquid adenambo neque. Bëdamboec tabadta —caquid yendac. —Nëishec ëbitsen icsamane —queshun nëishenquoio icquin aden chuiquid yendac. Abibi datantiadec: —Icsaquid nebi. Esus bëdamboen tantienquoio yec adecbidi icsatsiabi —quequin tantiec: —Bëdamboec tabadta —quequid

yendac. ² Adec bēdamboec isanec: —Bēdamboec tabadnuna —quec chuinanquiota. Adecbidi nashunanquiota. Aden naquin Nuquin Icbo Esuquidistun chiacpadomboen mimbi natsiac.

³ Utsien: —Utsibēd onquetiapimbo iquebi. Ēbiuidtsēqui bēdambo iquebi —quec abibi muauadquid icsambo iquec. ⁴ Adenquio yec mibibi datantiadta. —¿Nuquin Papan chiacpadectabi bēdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash adecbidi bēdambo icta. —Utsitedi icsambo icnubi ēbiuidtsēqui bēdambo iquebi —quenda. ⁵ ¿Mimbi utsibon naid chuibanshoda Nuquin Papan: —Mibi bēdambo iquec —capatsiash? Padenquio. Mimbi bēdamboen naid isun: —Mibi bēdambo iquec —catsiash.

⁶ Esus tantiaquidon nadoquid yendac. Nuquin Papan chiaid abi chuibanquid nashunquid yendac. ⁷ Piacbo sequidbimboec matses iquec. Tantienuio icquidēn icbompin uestsaidi siac canienquio ictsias. Padnuen tantiaquidēn ēshē bēdaidquio siac bēdamboec canitsias. Tantienuio icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unēsash Nuquin Papa yacno nidtiapimbo iquec. Padnuen Esus tantiaquid ambi chiacpadomboen naic unēsash Nuquin Papa yacno nidendac. Ēbi adsho tantiash: —Icsaido Nuquin Papan cuidenuio ictsias —quec muaic tabadenda. Ambi chiacpadomboen mibi cuidendac. ⁸ Ambi chiaid niac-niaquec abi icsate bunaiduidi naquid cuidendac. Nuquin Papan Mayanēn tantiamiacpadomboen naquidien bēdamboec tabadec unēsash Nuquin Papa yacno tabadendac. ⁹ Ēmibi aden chuisho tantiash bēdamboec tabadta. Bēdamboec tabadec chieshtoenquio icsho isun ambi tantiacpadēn Nuquin Papan abēdi nuqui tabadmendac. ¹⁰ Adec bē-

damboec tabadquin utsibo bēdamboen isquin nashununa. Aden utsibo bēdiactsēc tantiec Esus tantiaquido yec tantiananquiec nashunanquionona. —Shubu abentsēquēn tabadquidobimboec Esus tantiaquido iquec —qeshun adonona.

Pabadon ěnquimbi chiaid

¹¹ Is. Nua-nua icnuc dada uaquin ěmbimbo ěnquimbi dada uanu. ¹² Muaquin chuiquidon mibi con tsusedpan chiacpadomboenuidi nametiadquio iqueque. Aidon chuisho tantienda. Con matses isadaidbo: —Mibi bēdambo iquec —camenuen mibi adometiadquio iqueque. —Esusuidi chuisho con matsesēn chieshēnquin cuidnushe. Moisesēn chiacpadomboen namenu —quequin mibi shui dēbid dēteshunemetiadquio icchitec. Aido muasho tantienda. ¹³ Aden mibi: —Adota —caquidombi Moisesēn chiactedi nainquien icchitec. Adquid yec: —Is. Bēdambo iquebique. ěmbi chiacpadomboen nēidon naosh —quenuembien mibi shui dēbid dēteshunemetiadquio icchitec. Aidon chiacpadomboen nainda. ¹⁴ ěbien adtiapimbo iquec. Esus tantiesabimboec: —ěbibi bēdambo iquebi —quetiapimbo iquebi. Esusuidtsēqui bēdambo iquec. Abi tantiaquid cuidmenquio icnuec abided ciudadec unēspac caondash cuesten dectanac. —Aidquio tantiec bēdambo iquebi —caimbi. Aden Esus tantiec: —ěmbimbo Moisesēn chiactedi naquin Nuquin Papa bēdamboen ismembi —quec ěnēdonabi. Adecbidi Esus tantiec ěbi bunaid ěnash icsate bunenquio iquebi. ¹⁵ —Moisesēn chiactedi naquiduidi Nuquin Papan bēdamboen istsiash —quetiapimbo iquebi. Shui dēbid dēteshuni-aidēmbi Esus tantienquio icsho Nuquin Papan cuidtsiash. Adembidi shui dēbid dētiacmaidēn Esus tantienquio icshobidi cuidtsiash. Nuquin Papan Mayanēn chuca uaidien Esus tantiaquid Nuquin Papan bēdamboen isquin

bëdamboen tabadmec. ¹⁶ Ëmbi aden chuisho tantiash: —Ai, abimbo mimbi caique. Adonona —quesho: —Aido Nuquin Papan bëdamboen isquin bëdambo icmepashun —caimbi. Adquido Nuquin Papan: —Con matsesquio nec —caindac.

¹⁷ —Abimbo chienquien icchitec —ëbi cainda. Esusën chiaidquio chiombi. Aidquio tantiaquin ambi chiacpadomboen nabanta. Ëmbi Esusën chiacpadomboen nasho isun chieshënquin cuesaniondashi. Cueson daid bish abi iquec. ¹⁸ Tanta, con utsibo. Mibi Nuquin Papa chianembi naden. —Mimbi nabocpadomboen con Icbo Esuquidistubëdtan Cadasia yacnocquido bëdamboen ista, Papa —quequin Nuquin Papa chianembi. Padi. Aidedi chuiquin dada uaombi.

Esuquidistu Chuiquin Tantiamete
New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

